

Lajčák: Sporazum iz Pruda ne može biti predstava za međunarodnu zajednicu



Visoki predstavnik i specijalni predstavnik EU, Miroslav Lajčák, sastao se danas sa predsjednikom HDZ-a BiH Draganom Čovićem sa kojim je razgovarao o dogovoru postignutom na sastanku predsjednika SDA, HDZ-a BiH i SNSD-a tijekom vikenda u Prudu.

Konstruktivan pristup rješavanju problema je ono što međunarodna zajednica očekuje od domaćih političara. Visoki predstavnik je istakao zadovoljstvo činjenicom da dijalog i kompromis, nešto na čemu insistira tijekom svog mandata, počinju da dobijaju legitimitet u javnom političkom životu BiH. Ovo je dokaz da je moguć kompromis kada postoji spremnost za otvoreni dijalog.

Ovaj sporazum pozdravila je i EU kroz podršku iskazanu od strane Javiera Solane, visokog predstavnika za zajedničku vanjsku i sigurnosnu politiku, jer bi postignuti sporazum mogao riješiti ključna pitanja za napredak ove zemlje i ubrzati njen evropski put.

Zajedničko je razumijevanje da vremena za gubljenje više nema te da postignuti dogovor treba što prije staviti u parlamentarnu proceduru te nakon usvajanja krenuti sa njegovom provedbom. "Ovo nije trenutak kada se u prvi plan trebaju isticati osobni ili stranački interesi nego interes BiH te još

jednom pozivam predstavnike svih političkih stranaka na maksimalan napor u smislu potpore ovom sporazumu. Nerazumijevanje važnosti te izostanak potpore ovom sporazumu Bosnu i Hercegovinu izlaže opasnosti da zaostane za svojim susjedima na putu ka Evropskoj uniji", izjavio je visoki predstavnik i specijalni predstavnik EU Miroslav Lajčák.